

**IN SOLEMNI
AUSPICATISSIMA
INAUGURATIONE
ILLUSTRIS.
ATQUE EXCELL...**

Nicolò Petricelli





PANEGYRICUS .



Iluxit tandem dies ille optatissimus Patriæ , a Te verò etiam impatienter expectatus, **EQUES , ET PROCURATOR AMPLISSIME** , quo & illa placeat sibi , quòd merita tua , quæ omnem re- pendendi vicem supergressa vide- bantur , universi acclamationibus po- puli remuneratam ex æquo se putet , & Tu illi gra- tias , quas jamdudum cupis , coram , & propalam agas , quòd omnem in remunerando Te modum ex- cesserit . Venis ergo volaturus etiam , si liceret , ut liu desiderato fungaris officio , aurea jandiu tua Sto- a renidens , recenti verò , sed propria futura dein- ceps Purpura redimitus ; ornatior tamen , atque ex- celsior eo , qui magis tuus est , magnanimi non tam spiritu , quàm vultu , quo virtutes omnes , quibus hæc ipsa insignia meritis es , planè prætesers . Lon- gum , quod honoris non tam præstandi , quàm ac- ci- piendi causa , præcedit agmen , lætitia exultat , quòd maximæ hujus Veneti seculi futuræ gloriæ , ac felici- tati interesse sibi , atque inservire contigerit : longior verò , & spectabilior , qui ponè sequitur , Procerum

comitatus , gratulatur tibi , & merito vertit ; quòd in hac seculi gloria parienda partem etiam habuerit . Quacunque incedis , vides in oppletis undique viis conversa in Te omnium lumina , aliorum de visu tandem noscentium virtute , & fama super æthera notissimum , aliorum avidos Tui conspectu saturantium animos tua diuturniore absentia jejunos : voces etiam audis , quas ex illorum obtutibus , sed magis ex tua conscientia veraces credas , plaudentium Tibi viso , sibi que quòd videant , & hujus à grata Tibi Patria collati honoris non tam tuæ , quàm publicæ felicitatis causa perennitatem ex animo comprecantium . Gestit interim Patria suis videns , audientque in benemerentissimum de se Civem præmiis ab universis civibus tam perspicuè acclamari ; mox gavisura profusiùs , ubi rursus audiet jucundissimam illam vocem millies quidem è scriptis , ac beneficiis perceptam , sed per decem ampliùs annos nisi peregre non auditam , qua suavissimas illi gratias ages , Teque , si locus dabitur , lubentissimè etiam relaturum longa facultatis , ac voluntatis tuæ experientia jam persuasæ polliceberis . Felicissimum , faustissimumque Patriæ , Tibique diem , & in fastorum æternitatem meritò abiturum , iniqua , neque illo satis digna memoria posteris transmittendum , si non lætioribus , quàm quævis olim Romana ovatio , vocibus consignetur ! Sed enim hunc ego diem , quamvis pulcherrimum , lætissimum , ac memorabilissimum putem , illi tamen alium antepono , à quo nimirum hujus ipsius pulchritudo , lætitia , & ea , quam meretur , perennitas profecta est . Jam intelligis , Eques Grimane , me illum significare diem , quo summo

Pa-

Patrum consensu Procurator absens, dumque adhuc in opere merebaris, es renunciatus. Et quidem hodierna die quidquid celebritatis, ac pompæ læti, & mirabundi conspiciamus, quid aliud est, quàm quòd merita tua pro dignitate, quantum fieri potest, attolli, & exornari videmus? Cum superiore illa die, quibusdam pene de Te quæstionibus habitis, tua ipsa merita inspecta, examinata, & cognita fuerint, ac pro solidis tandem meritis, & qualia fama (verane usque ad id tempus, an falsa?) prædicabantur, etiam Veneta auctoritate haberi cæperint. Hodie talis incedis, qualem Te Patriæ munificentia voluit, & fecit: tum verò disceptatum est, an hac Patriæ munificentia dignus esses, & utrum talis fieri merearis. Nunc omnia tribuuntur felicitati tuæ, cui gratulamur: tunc omnia data sunt virtuti, cui quæ nunc dantur, tunc sunt comperta deberi. Hodie denique tota plaudente Urbe felicitas tua triumphat: tunc Urbe tota judicante virtus tua merita visa est, ut hunc acquireret tuæ felicitati triumphum. Ego verò ut triumphum specto avidius, in quo plus video jucunditatis, sed pluris facio victoriam, cujus est ipsum mereri triumphum: sic felicitatem tuam veneror plurimùm, quam miror splendoris, & amplitudinis plenam, sed virtutem tuam illi præfero, cujus inius merito effectum est, ut ipsam felicitatem assequeris. Itaque hoc, quantum fas est, prætermisso die placet illum, à cujus gloria hujus est tota lætitia profecta, quodam quasi jure postliminii revocare, quo tuam hanc felicitatem tacitè veneratus, de tua virtute dicendum suscipiam, Teque ad illud habitum iam de tuis meritis Patrum, Magnique Consilii judi.

diciūm reducā ex integro . Quid enim inde dubi-
 randum sit, quod hujus diei serenitatem obnubilet ;
 cum ipso etiam illo die securi fuerimus , neque ali-
 quid timeremus ab ipsa temeritate fortunæ, cui pro-
 fectō sciebamur nihil esse juris, ubi Veneta Sapientia
 disceptat ? Illud potiùs verendum est , nequid ego
 aggrediar majus viribus meis animosior , quàm ut
 possim , aut debeam . Cum enim mihi difficillimum
 futurum esset de felicitate, re videlicet tua, verba fa-
 cere : fatin' mihi facultatis erit de meritis, ac virtu-
 tibus tuis, hoc est de Te ipso dicendi ? Audebo ta-
 men & hoc ipsum , quoniam semel id jam cæpi
 præsumere , ut de Te quoquo modo loqui possem ,
 materiæ non tam gravitate , ac difficultate deterri-
 tus , quàm copia, & splendore animatus . Quid enim ?
 Exiguam sentio mihi vim esse dicendi ? Juvabit me
 dicendarum mira rerum copia, quæ non finet oratio-
 nem siccam esse, aut jejunam . Humilem timeo sty-
 lum, sublimique argumento minimè convenientem ?
 At splendor , & magnificentia , qua Tu res gessisti ,
 illarum etiam narrationem ornabit , impedietque ,
 quò minùs quidquam humiliter , demissèque dicatur .
 Tu etiam utriusque ausi, qua soles humanitate, dicen-
 ti veniam dabis , qui & scias , quàm impia tali in-
 re, ac tempore mea taciturnitas esset , & operosissi-
 mum esse cuilibet Te laudare, quantavis sit modestia
 tua , negare non possis . Ergo electionem illam , qua
 D. Marci Procurator es renunciatus, primùm raram ,
 & inusitatam, deinde justam fuisse ostendam , eritque
 illius justitiæ postremum hoc argumentum , quòd
 omnibus non modò cunctorum Ordinum civibus , sed
 etiam exteris Gentibus grata , accepta , & summè
 pro-

probata fuerit . Sed exteris quidem Gentibus , quæ Te mirantur , & colunt , Eques , & Procurator Amplissime , minùs fortasse hæc electio tua accepta fuerit , nisi satis perspecta sit illis magnitudo collatæ Tibi dignitatis . Ut enim tanti faciant , quanti par est , Venetos honores : quis tamen sciat , an hunc , quem Tibi mira etiam studiorum consensione delatum accipiunt , immensis , ut censent , meritis tuis existiment parem ? Inspexerunt scilicet virtutes tuas per eos omnes annos , quibus Patria Te illis indulgit , easque ita miratæ sunt , ut crederent omni remuneratione majores . Sciant igitur Venetam munificentiam non minùs insuperabilem esse , quàm fortitudinem , utque a nullo victa est unquam utut generosissimo Principe , ita ne vinci quidem posse à civibus suis . Sciat Gallia , quæ Te mirabunda gustavit adolescentem : sciat Anglia , in qua summam , quam concitaveras adolescens omnigenæ virtutis expectationem , Legatus vicisti : sciat Germania , quæ Te Viennæ veluti in theatro quodam totius Imperii res maximas non modò alacriter capessentem , sed etiam feliciter obeuntem per quinquennium suspexit : sciant omnes , ad quos vel admiratio Tui , vel fama pervasit , sciant Te maxima præstitisse quidem Patriæ , sed etiam maxima ab illa recepisse : sciant denique huic Te Procuratoriæ dignitati decori quidem esse , sed illam etiam Tibi . Hujus enim præstantissimæ dignitatis non satis est , si ut cæterarum in Republ. electio solitæ relinquatur fidei , atque integritati , quam Veneti Proceres Patriæ , & communi gloriæ , ac felicitati debere se norunt . Sed universum Magnum Consilium , ubi ad illius suffragationem deveniendum est ,
com-

communi Sacramento per gravissimum Magistratum concepto recipit , non aliam se , quàm virtutis , ac meriti rationem esse habiturum , seque devovet diris , nisi pro illo censuerit , quem optimum omnium , meritissimumque cognoverit . Igitur ex toto numero primùm ii secernuntur , qui certis quibusdam meritis se supra cæteros erexerint : deinde ex illis ipsis unus deligitur , qui inter eosdem veluti Luna inter minores ignes præfulgeat . Quid hoc iudicio potest esse honorificentius , in quo nescias utrum speciosius sit , quod à tot , ac talibus datur , an quod ab uno ex tot , ac talibus delecto tanta cum religione datum accipitur ? Datur enim ab eo virorum cætu , qui cum multitudine integri populi cætus videatur , sapientia tamen , cæterisque omnibus tum fortunæ , tum virtutis ornamentis concilium est Procerum , quos voces optimos Optimatum . Accipitur verò non minùs certa , quàm speciosa declaratio Venetæ Sapientiæ in unum collectæ , esse illum , qui accipit , lumen , ac florem Venetarum virtutum . Adde , quod neque otiosa dignitas est , quæ tam præclare conferitur , instar nonnullarum Deitatum ; quæ duntaxat nectaris , & ambrosiæ participes , cæterùm sine imperio , ac numine , nihil , nisi numerum , & varietatem Deorum augebant ; sed illi gravissima quæque Imperii munera demandantur . Namque à principio quidem , cum unus tota Urbe Procurator esset , sola fuit illi cura Basilicæ D. Marci , ut in ea dignè , cautèque Sanctissimi Evangelistæ Corpus velut alterum Urbis Palladium asservaretur . Sed ubi crescens rerum moles primùm ternos Procuratores , deinde senos , postremò etiam novenos creandos esse monuit : huic

ter-

ternæ veluti Angelicæ Hierarchiæ omnia placuit pia munera injungere . Itaque D. Marci Procuratorum est Sacras ædes erigere , Divinum cultum , & religionem accendere, pupillorum curam suscipere, viduarum causas tueri , honestorum civium paupertati occurrere , Patriæ denique , atque universæ Reipub. salutem quâ privatim , quâ publicè undequaque prospicere ; prorsus ut in hujus unius dignitatis cura , & vigilantia totius Imperii securitas , & æternitas etiam officiorum sanctitate innitatur . Ergo illi meritò major Toga , & Purpura quotidiana , ac propria , conceditur , hoc est nova quædam Trabea, speciosior scilicet, augustiorque, quàm Consularis olim credita de-
cuisse majestatem Romanam : meritò Senatoria auctoritate sine annuæ suffragationis alea perpetuè impertitæ aditus in mentis , & consilii publici templum nunquam intercluditur; & quamvis nullo apparitorum, licetorumque satellitio stipatæ, tantum tamen observantiæ , ac venerationis defertur, quantum par est maximæ post unicam , quæ sacro redimita Cornu in folio adoratur . Nam quod audis Procuratoris modestum , ac civile , ut in Repub. nomen , postquam etiam Pontificis fabrilem quondam, & mechanicam vocem inter Imperatorios titulos legis , non ideo minùs venerabilem , & dignam principe viro illius dignitatem putes . Ego profectò Venetis D. Marci Procuratoribus non Ephoros Lacedæmonis , non Prytanes , aut Archontes Athenarum, non Suffetes Carthaginensium ulla de causa æquaverim . Ex hodiernis verò potestatibus , si supremas , & regias excipias , nullam ubivis gentium reperio , quæ modò judicio , & meritis tribuatur , quàm Procuratoriæ

B

huic

huic dignitati vel amplitudine, & honoris insignibus antehabeam, vel auctoritate, & rerum agendarum magnitudine conferam. Jam verò in hac tanta dignitate Grimanus Laurentio Superantio suffectus est; cui viro, Deus immortalis! Quàm præclare de universa Repub. merito! Quanti ipse quoque nominis apud exteras gentes, quas magnificis, atque æterna memoria dignis legationibus adierat! Cujus adhuc famæ, atque existimationis apud ipsos superbissimos Othomanos, à quibus ob receptam recèns Peloponnesum Venetæ virtuti ut cum maximè excandescentibus non modò non injuriosè (barbaris inusitatum) sed etiam honorificè acceptus est, cum primus post bellum Legatus ad illos accederet! Ut vel ex hoc ipso facilè cognoscatur, quanta sit Procuratoria dignitas, quæ summis etiam Superantii meritis pat credita fuit. At quomodo suffectus? Electione scilicet rara prorsus, & nova; ut in qua solus est nominatus, mille ampliùs Patrum, qui tum suffragia ferebant, votis omnibus designatus, eaque designatus ætate, in qua cæteri vix agere incipiunt, ut designari mereantur. Quid enim tam rarum, quàm ut in Repub. optimis viris, & præclarissimis civibus affluente, cum non annua, sed perpetua dignitas destinaretur, tam ampla verò, ut vel Xenocratis animum ad ambiendum movere possit, unus nominetur Grimanus; cum tamen sex, & triginta nominent, &, nisi quòd jurisjurandi religione se obstringunt, ut nonnisi dignissimum nominent, nominationem faciant ea libertate, quæ ne ambitu quidem coarctetur? Paucos admodum invenias mihi, quamvis inter Stoicos quæras, qui vel ita modicè sibi pla-

placeant, ut se non satis dignos honore, & magistratu putent: vel ita frigide se ament, ut à petendo alterius prælatione abstineant. Pauciores adhuc reperiās, quos contra multi sic admirentur, & probent, ut deinde singuli prædicare jurati velint, eorum aliquem supra quemlibet eminere. Te verò, Grimane, Magistratum maximum Venetiis petente, nemo ex tam multis, qui petere possent, tantus sibi visus est, ut unà Tecum petere auderet? Nemo tam multorum, qui nominarunt, non sibi religionem fecit, si quempiam alium digniorem, aut saltem æquè dignum declararet? Qua in Repub. factum id esse legimus, ubi non inusitatum, ac penè miraculo cuidam simile visum fuerit? Non in ea profectò, in qua competitores, & æmulos non modò dubiæ virtutis Themistocles, & Pericles, sed etiam omnino iusti Aristides, omnino boni Phociones offendebant. At ne in illa quidem, quæ siquando candidatos Catones vidit, etiam Vatinius unà petere (petere autem?) immo & præferri facinus ipsa mirata suum, & perosa conspexit. Namque in hac singulari Repub. quis nescit morem illum ab institutionis fortasse Comitum perenni consuetudine servatum, ut quisquis magistratum petat, alter protinus obijciatur, qui saltem explorandæ causa suffragantium in se voluntatis apertam illius petitionem sublatente petitione sua non tam impediatur, quàm honestet? Ergo Tibi, Præstantissime Procur., nullus obstreperit competitor vel alieno iudicio, vel suo; quod cum omnibus in comitiis rarum sit, in Venetis verò est rarissimum, nisi fortè hoc rarius esset, quòd solus à sex, & triginta nominatus cunctis postea

mille suffragantium votis renunciatus fueris . Hoc si quisquam est , qui parum difficile putet , eum necesse est ignorare , quantæ sit difficultatis mille homines in unam sententiam adigere . At quos homines ? Incautos , puto , & leves , clientelæ addictos , & in quamcunque partem libuerit sequaces . Annon circumspectissimos omnium gentium , gravissimos , & constantissimos , jurisque sui , & amplitudinis , ut qui maximè , compotes ? Parum est , si dixerò (sensus est Euripidis) (a) rarum reperiri hominem , qui multis placeat hominibus ; vix enim reperitur , qui tam communis sit , quisquam è Diis , quorum alios aliis cordi esse , ac venerationi videmus . An cum tres , non ampliùs convivæ (quæ alterius est observatio egregii Poetæ) (b) in mensa fere dissentiant , neque in laudandis , aut aspernandis iisdem epulis nisi perquam rarè concordent : in Venetis Comitibus unus Vir , licèt præstantissimus , frequentissimo Nobilium populo probari universim poterit ? quodque non Ciceronianæ , non Tuæ ipsius , Grimane , eloquentiæ vis effecisset , unica propositio , optima illa quidem , sed tamen unica Tui propositio universos mille Patres in unum consensum sine miraculo traxisse credenda erit ? Nam quòd unus , Proc. Amplifs. , cunctis nominantium vocibus proponi auditus fueris , hoc suffragationem tuam onerare po-

Ἄλλοισιν ἄλλος θεῶν τε καὶ ἀνθρώπων μέλει. id est.

Hic bis , hic illis & homo cordi est , & Deus.

(a) *Eurip. in Hippol. Coron.*

(b) *Horat. Epist. 2. lib. 2.*

potius debuerat , quàm ita mirificè fortunare . Hæc olim Athenis injustissimi illius Ostracismi , qui tum in ea præclarissima alioquin Repub. moris erat , justissima causa fuisset . Quid enim ? Majoribusne de causis Themistocles , & Cimones , aliaque hujusmodi firmamenta illius Reipub. , & ornamenta Græciæ in suspicionem , aut invidiam cecidisse credimus , & ingrata Patriæ turpes non suæ culpæ , sed gloriæ poenas luisse ? Itaque civitas illa reprobasset , quem tanta esse apud se in gratia videret , tristibusque testulis à lugentibus ipsismœnibus repulisset , quem nimis placere sibi misera cognovisset . At in hac Civitate minùs porro , quàm illud ipsum Græciæ caput , barbara non ita sinistrè , malignèque agitur cum virtute : neque hæc humanissima juxta , atque sapientissima Respublica adeo est , vel stultè inimica sibi , vel iniquè ingrata civibus suis . Mirum tamen est , quod talem nominationem talis electio subsequuta fuerit . Mirum , quòd civem ita , ut viderant , acceptum , ideoque in Reipub. temporibus egregiè versatum operosa quidem , sed tamen quiete , ac vacatione ab iis muneribus , quibus merebatur , adeo cita , ac penè præcoci tam multi donarint , neque sibi vegetum adhuc , & ferendis oneribus parem ad alia Reipub. tempora reservare voluerint . Mirum , quòd tum plerique non ita dixerint sibi : Hem quid agimus ? Petrum Grimanum , aut si non ipsum , ejus operam nobis ipsi eripimus ? Quid hæc omnium unius nominatio , nisi quòd nobis prædicat in legationibus singularem ? Nunc si eum Procuratoria Trabea domi tenere , & quasi ligare decernimus : quem potiorẽ illo , siquid opus fuerit , ad exterarum nationes legabimus

mus ? Equidem is talis jam , ac tantus est , ut hunc mereatur , & altiozem etiam , si quis esset in Repub. dignitatis gradum . Sed satis adhuc superest longi temporis , & nobis , ut grati esse possimus , & ipsi , ut hæc animi nostri argumenta ferat . Ecce , quod illi , nobisque felix , faustumque sit , integra adhuc ætate floret , non minùs juventæ , quàm meritorum decore conspicuus . Non auferatur ipsi debitus honor ; sed quoniam citra periculum pietatis nostræ potest , & ex usu comimodi publici debet , differatur . Interim meritorum , virtutisque illius præmium , quod ipse , ut est generosus , non aspernabitur , sit ipsa virtus , cujus nos occasiones exercendæ , dum per florentem ætatem licet , ideo non ingrati suppeditabimus . Non unum suspicimus in tanto Patrum numero natu grandiozem , cui Procuratoriæ Purpure decus , si non æquo jure , tamen utcumque debeatur . Quisquamne inter nos exstat , in quo dilatio pietati nostræ videri periculosior possit ? Huic hodierna die , ipso etiam non abnuente Grimano , gratificemur . Hæc , quæ inusitatus favor ille suggerebat , diætane fuerint iis in Comitibus , aut ne cogitata quidem , exitus patefecit , quo docti sumus omnia meritis posthabita esse , etatisque tuæ non ex annis , sed ex factis ductam esse rationem . Itaque illud etiam effectum est planè inusitatum , & post hominum memoriam in vetustissima Repub. novum , ut integra etiamnum numerosa Familia , viventibusque , ac lætantibus optimis parentibus Procurator esses . Quo quidem quid pulchrius ? quid etiam tenerius dici , aut cogitari potest ? Quid Tibi , & illis jucundius ? Quid illis jucundius , qui Te , cum optimum , quo tempo-

re

re apud se habere licuit, voce, exemplis, atque omni conatu facere semper studuerint, post multas, diuturnasque ablegationes vident, & amplectuntur iudicio totius Patrię etiam meliorem? Quid iucundius Tibi, qui cernis, & sentis illos tua Tibi vita cariores tanta lætitia, tantaque iucunditate tua unius causa perfusus? Capiunt illi fructum maximum sedulitatis illius, quæ neque sumptui, neque labori pepercerunt unquam, ut Te utilem Patrię redderent, & illius etiam quandoque honoribus dignum. Capiſ Tu quoque maximum fructum caritatis tuę, quæ nihil unquam antiquius habuisti, quàm ut piam illorum diligentiam, non equares modò, sed etiam superares. Quoties illi osculabuntur hanc Purpuram, qua viderint abs Te, quod ipsi glorię patrimonium à maioribus acceptum vehementer amplificaverunt, tam mirificè auctum esse! Quoties Tu illis, ac præsertim Patri Purpuram hanc ipsam subicies, fassus, quod sæpè jam eo non audiente, illius eam esse magis, quàm tuam, cum ipse Tibi, si non meritum, certè conditiones dederit, quibus mereris! Sed longiùs, quàm volebam, egressi sumus, dum pulcherrimam prosequor hanc pietatem, quam Pater exquisitis officiis tota Repub., Tu verò gratis sermonibus tota ferme Europa sic notam fecistis, ut Pii cognomentum uterque vobis proprium penè ubique adsciveritis. Itaque ut ad inceptum redeam, hæc electio tua, Proc. Ampliss. hisce omnibus de causis, tam rara fuit, ut modò miranda nobis, posteris vix credibilis futura videretur: nisi ex altera parte adeo iustam esse constaret, omnibusque expetitam, ut & querele deinceps nostrę, & posterorum etiam insectationes nimium metuende fuissent

sent, si aliter, quàm per publicam sapientiam statutum est, per fortunę temeritatem accidisset. Non enim tanta dignitas soli Grimanæ domus nobilitati tanta consensione donata est : aut hanc Purpuram cognitionum, & affinitatum ambitus, atque opes ab invitis, ac nolentibus Patribus extorsere. Scio Grimanorum Gentem (quis enim est penè ubique terrarum, qui non sciat?) inter Venetas Familias ne ipsa quidem vetustatis dote ulli præstantissimarum secundam ipsi esse huic Imperii principi Civitati coævam. Coævam autem? Illud etiam scio, nobilem jam ab initio rerum huc advenisse, & aureis veluti cunis futurę Patriæ substratis, enascentis tum novę Serenitatis radiis per datos identidem strenuos Tribunos quasi quosdam regios altores etiam suos interjecisse. Exinde verò ad hanc usque Veneti nominis amplitudinem quàm multorum legimus inclaruisse crescentem in dies cum ipsa crescente omnium virtutum genere præstantium continua serie virorum! Prope ut Majores Venetos ex Grimanorum Majoribus recensere liceat, & promiscuè unius Gentis Historiam pro totius Patriæ annalibus usurpare. Quoties enim necesse fuit bella gerere, quibus Grimana Gens Imperatores non dederit? Quoties Legationes ad externos Principes decernere, cum Oratores ex Gente Grimana accersendi non fuerint? Hęc Urbem domi, hæc foris, hæc Imperium togata, hæc paludata protexit. Captumne unquam aliquod est repentinum, & Reipub. eternitati salutare plusquam humanę sapientię consilium? Mirum, si non aliquis Grimanus Senator auctor illius erat in Curia, idemque suasor. Memorandumne quodpiam auditum est in perplexa, involutaque causa judicium Salomonice Sapientię tri-
buen-

buendum ? Mirum , si non aliquis tum Grimanus iudex pro Tribunali disceptabat . Quare omnibus in unam Domum gratæ Reipub. insignibus quasi debitis omni ætate congestis, quid non in immenso Grimanorum stemmate titulorum, honorumque percentfeas ? Nempe duas præ cæteris maximè venerandas imagines Antonii, & Marini, qui quarti, & quintidecimi seculi Ducales fastos insigniunt : Præturas, Præfecturasque, Stolas Equestres, & Paludamenta tam multa, ut Argus etiam si fueris, oculis complecti non valeas : Tiaras etiam, & sacros Lituos, necnon duabus hætenus supra viginti Venetis Purpuris non paucas admixtas etiam Romanas . Quod minùs mirandum sit, præclarissimas quasque Urbis familias hujus nobilissimæ Gentis propinquitatem dandis, vel accipiendis conjugibus nulla non ætate appetivisse: seque omnes, licèt proavorum, & sua gloria onustissimos, plurimùm tamen auctos dignitate arbitratos esse, quibus cum Grimanis affinitates jungere contigisset; ex quo denique effectum est, ut coeuntibus in unum undequaque rivis, ac fontibus, Grimana nobilitas quædam facta sit veluti abyssus Venetæ nobilitatis . Hæc omnia cum probè sciam, illud tamen repeto, & clarioribus, quàm antea verbis contendo, non istas hujus, quam tantopere admiramur, electionis causas fuisse . Aliæ omnino, aliæ causæ fuere; propter quas, si non etiam plebejùm eligi oportuisset, certè illum, qui neque tanta generis commendatione, neque tantarum affinitatum præsidio confideret, sed solis se virtutibus tutaretur . Electus es, Petre Grimane, Procurator, non quia Grimanis Majoribus ortus esses, nec quia plurimo-

C

rum

rum affinium opibus juvareris ; sed quia Grimanis ortus Majoribus, & tantis affinium opibus adjutus, ita tamen Te Patriæ commodis devoveras, ita laboraveras in salute Reipub., ut si hæc tanta præsidia in Te nulla forent, spesque Tibi omnes in Temet uno positæ essent. An Tu, si solum ex tuo nobilitatis globo prodiisses, & omni cognatorum tuorum stipatus numero descendisses in campum, non aliquem Tibi candidatum stare contra videres, neque ullum Procuratoriæ Purpuræ competitorem offenderes? Idcirco autem invenisti nullum, quia tot prodibas munus meritis, ac tam præclaris, ut petere Tecum ita nemo auderet, ut Tecum committi nemo præsumeret. Jam verò eò devenit tandem, quò ab initio properabat trepidans tamen, ac reformidans oratio mea. Quid enim dulcius, sed quid simul etiam est operosius, quàm de Petri Grimani meritis, ac virtutibus dicere oratione, cujus cum difficile sit exitum, ne principium quidem facile est invenire? Unde enim exordiar? Commemorabo nimirum exactam à Te in sapientiæ studiis non modò pueritiam, sed etiam illam ætatem, quam plerique serè adolescentes veteris, inclytæque profapiæ, ac Tuæ majorum gloria, & avitis opibus contenti præter naturam vivere videntur, si non totam in desidias, ac voluptatibus perdant? Quis enim dubitat, quin Te sic abdideris totum in literas eo ipso animo, quo jubebat Parens egregius, ut Te videlicet scholasticis, umbratilibusque exercitationibus ad capefendam strenuè Rempub. preparares? An tuas referam peregrinationes multas, & longas, non curiositatis, oblectationisve causa susceptas, sed (quæ illarum fructus fuit) ut Te, quam extuleras jam supra

eta.

ætatem, prudentiâ auctiorem Patriæ redderes, eademque, si placeret iterum ablegare, in iisdem regionibus, & apud eosdem Principes, quibus Te mirandum præbueras, tam libens, quam idoneus inservires? An initos Tibi, statim ac remeasti, Curiaë labores, cæptasque vigilias prædicabo, in ea videlicet eloquentiæ, ac prudentiæ palæstra, in illa irrequieta sapientiæ, publicorumque consiliorum officina, in qua dies, noctesque interceditur casibus, occursatur fortunæ, & adversus æmulorum machinationes, vel fatorum invidiam Reipub. incolumitati, atque æternitati prospicitur? Hæc Tibi tot maria, terrasque emenso, quæ Te perpetuo motu, jugique agitatione veluti sidera, quæ stare nesciunt, exerceret, gratissima per quadriennium quies fuit. An res tuis in Legationibus per Te gestas enumerare conabor? quibus virtutibus Angliam florentissimum ætatis nostræ Regnum jam Tui admiratione præoccupatum non modò Tibi, sed toti etiam Patriæ miro amore devinxis: qua vigilantia Londini veluti in specula totius Europæ omnium Principum mentes, & consilia penitus introspecteris: quo solertiæ vel ingenio, vel miraculo Britannos toto divisos Orbe cunctis ita gentibus admoveris, ut Te quoque per illos omnibus quamvis diffitis terris præsentem, & acceptum feceris; unde etiam in Trajectensi celeberrimo illo omnium pene nationum conventu, qui per eos annos celebratus est, Venetum nomen, Veneta auctoritas per Te, perque tuas curas, & sollicitudines plurimum invaluerit? Londonone Viennam transibo? quæque in illa Christiani Imperii Metropoli apud maximum, & potentissimum post hominum memoriam

Imperatorem producta ad quinquennium legatione ; in qua nulla pene dies sine Apellea linea , hoc est egregio quopiam , & tuo merito fluxit , pro Patria capeffiveris , & confeceris , colligam nunc singula , & dicendo commemorem ? Sed complecti hæc omnia volenti quantum temporis necessarium est ! An illi omnes anni sufficiant , quibus gesseris cuncta ipse promptior , alacriorque ad agendum , quam nos ad commemorandum ? Faciam igitur invitus quidem , sed exigua , quam secus defecturam sentio , vi dicendi coactus , quod vel auditoribus , vel lectoribus quandoque meis ipsis etiam alioquin defecturis probandum spero . Ex tot , tantarumque rerum solo , quem vix indicavi , apparatu unam eligam potissimam , ut reor , omnium , quam tua favente dignatione non exornem , sed enarrem ; de cæteris omnibus , quoniam ita necesse est , veniam silentii petam . Quæ igitur illa est ? Non inexpectata , non hactenus inaudita , non nova , sed omnibus nota , pervulgata , cunctorumque hominum sermonibus celebratissima , qua Petrus Grimanus non modò de Patriæ salute , & gloria , sed etiam de postremis (si superis placet) inusitatis Caroli VI. invictissimi Imperatoris victoriis , ac triumphis , de incolumitate totius Christianæ Reipub. deque universi Orbis , modò ne Othomanico iugo subjecti felicitate omnium gentium laudibus bene , atque optimè meritis prædicatur . Turcas Christianorum Principum , sed in primis Cæsaris , ac Reipub. , hostes perpetuos pungebat , supra quàm credi posset , extremi , quòd cum illis compositum erat , belli non tam ignominia , quàm damnum ; liquidem omnium gentium ,
 quas

quas in illud usque tempus adierant , vitiis potius nostris , quàm sua virtute victores , eo in bello , quo mutua inter Principes caritate , ac beneficentia Superos demerebamur , plura nobis restituere coacti erant , quàm quæ per summam injuriam idèd intulerant arma , ut eriperent . Ergo ut adhuc Scythæ sunt , hoc est media jam olim in Europa nihilò civiliores , neque fidem , neque perfidiam pensi quidquam habentes , in id unum inhiabant , ut saltem amissas in Hungaria , Græciaque regiones honestè , vel inhonestè reciperent . Itaque ut primum visum est opportunum , eruperat ex Hellesponti faucibus Turcica classis multorum annorum secreta sollicitudine ædificata , multitudine navium , sed magis magnitudine , ac robore formidanda , rabie , furore , cæcæque cupidine , plusquam velis impulsæ , majoribusque odiis , quàm ignibus fulminatura ; neque multò secius tempore ruptis priùs fidei , quàm Isthmi munimentis maxima vis barbarorum iisdem acta furis in Peloponnesum irruperat . Quanto tum in discrimine nostræ , atque universæ Christianæ Reipub. res essent , cum toto Ægæo , Jonioque citius , quàm ut percurri posse videretur , non perculso modò , sed etiam subactò , Corcyra , quæ reliqua erat unicum Italiæ , atque etiam ex ea parte totius Imperii Christiani propugnaculum , tota impeti belli mole prospiciebatur , recogitet secum ipse , qui possit , aut velit ; mihi animus meminisse horret , luctuque refugit . Nam quid etiam illam renovem totius Adriatici consternationem ? quid illam utriusque dexteræ , ac sinistræ oræ formidinem , cæptamque jam pene accolarum fugam commemorem , ubi jam superbissimi ho-

hostis ferociam ; & vires ita contudimus , ac fregimus , ut illi posthac magis à nostra virtute , quàm nobis ab illius immanitate , ac sævitia sit metuendum ? Jam Cæsar , deletis duobus illius maximis exercitibus , captis totidem inexpugnabilibus oppidis , amplificatoque ut cum maximè Occidentali Imperio , barbaris in ipsa Orientalis Imperii sede terrorem retulit suum ; verè Potentissimus , verè Maximus , qui non modò invictam Othomanicæ domus fortunam vicerit , sed etiam gloriam omnium retro , ut minimùm loquar , Dacicorum Cæsarum majoribus etiam , quàm Domitianus affinxerat sibi in ipsa Dacia victoriis superaverit . Jam Veneta etiam Respub. Corcyrensi Arce , atque Insula strenuè , mirificèque servata , disjectis passim toto Jonio , Ægæoque hostium classibus , ac pene profligatis , pluribus in Dalmatia , & Epiro urbibus , atque insulis ditioni suæ adjectis , effecit , ut immanissimum hostem à totius Italiæ , ac Dalmatiæ (& quis sciat , an hætenus ?) cervicibus , jugulisque submotum illati ultrò belli non semel pæniteret . Jam denique totus Christianus , & non Christianus Orbis lætatus est Thracium videns furorem suo superfuso sanguine defervescere , & insolentissimum illum Europæ , Asiæ , Africæque Tyrannum pacem , deposito tandem fastu , supplicem petere , paulòque ante spoliante jam , atque exultantem leges accipere ab abjectis . Quò minùs velim amota jam pericula , præteritumque nostrum pavorem repetere , hujusque tantæ gratulationis lætitiæ horrenda quavis recordatione temerare . Illud tamen præterire non possum , quantopere enitendum , ac prope laborandum fuerit , ut Cæsar , cujus in virtute , ac po-

ten-

tentia unicum arctis à principio in rebus perſugium
 eſſe putabatur, ad amplectendam tam præclaram rei be-
 ne gerendę occasionem adduci ſe ſineret. Hic enim labor,
 tantumque ex eo meritum, quanta inde Cæſari, Reipub.,
 omnibuſque bonis felicitas orta eſt, totum eſt, Petre
 Grimane, quantumcumque eſt, totum eſt, inquam,
 tuum. Nam cum Thraciuſ furor in Oriente deſevi-
 ret, omnibuſque interim totiuſ Adriæ litoribuſ treme-
 retur: Tu Viennæ ea voce, qua toties in conſpectu
 Regum locutus eſ (a) nunquam conſuſus, inſtare
 Cæſari, eundem precari, obteſtarique: Ut paterni
 cum Repub. ſcderis meminifſet: de perfidiſis juratæ
 ſibi quoque pacis ruptoribuſ penas ſumeret; aggre-
 retur à parte ſua, qui ex altera ſocios inſontes contra
 omne faſ aggreſſi eſſent: barbaroſ, qui ſe illinc ſimula-
 tæ ad tempuſ amicitiaſ titulo ſecuroſ crederent, de-
 bacchari nunc totis viribuſ in Oriente: ne ſineret eoſ
 Orientiſ, & utinam non etiam Italiaſ ſpoliis contra ſe
 creſcere: diſturbaret tot illorum ſibi minitanteſ victo-
 riſ, & rapinaſ: ſuaſ etiam, & præteritaſ, & præ-
 ſenteſ, & imminenteſ injuriaſ ultum iret: ſumeret
 arma utique invicta pro tam juſta, & pia cauſa fu-
 tura. Verùm Tibi nihil ſuccedere, quodque fuiſſe
 quondam Caſſandraſ fatum dicitur, renovatum videri;
 niſi quod illi non credebatur, cum triſtia, Tibi
 cum fauſta, & læta portenderet. Quid enim faceret
 Cæſar? aut cur excelfa illiuſ prudentia tanta in re
 non ambigeret? Verſabantur adhuc in oculiſ perſpi-
 cua

(a) *Loquebar in conſpectu Regum, & non confundebar.*
 Inſcriptio vehiculi majoriſ, quo Grimanuſ
 Legatuſ utebatur.

cua superioris belli vestigia , in quo ut victum , ac triumphatum esset , nondum tamen tot victoriarum , pretia erant omnia exsoluta . Alta durabant adhuc impressa Viennæ , totique Imperio vulnera , certè cicatrices nondumerant omnes obductæ . Turbines etiam prospiciebantur jam tum ex aliis Europæ plagis , qui , si in incautum , & imparatum , aut aliàs occupatum Cæsarem incidissent , possent faciliùs opprimere . Itaque non placere hoc bellum Cæsari , non utile , non necessarium , immo etiam periculosum videri : obrectare illi omnes , qui Cæsaris consilium participant : vulgus etiam , in quod jam sparsæ res erant , aversari illud , ac detestari : odia in Te , simultates , pericula etiam nasci , & crescere in dies illius auctorem . Bone Deus ! Ut quid nobis adversa tam multa nullo procurante contingunt ; tanti verò constat , siquid aliquando prosperi providentia parat ? Quis interim satis possit , optime Petre , laudare , vel mirari zelum , fidem , & constantiam tuam ? Neque enim Te sollicitudines , contentionesque istiusmodi pauculos dies , sed ad decem amplius menses exagitarunt ; Te instante quotidie , Te repulso jugiter , Te non idcirco cessante unquam , aut remittente ; prorsus ut Te non Patriæ , sed Dei sapientia delegisse videretur ad hanc præclaram , tum verò necessariam patientiam natum , factumque . Verum enim verò , quid non vincit , quid non obtinet tandem pia , & invicta constantia ? Vicisti , Petre , Tecumque vicit Cæsar , Tecum vicit Patria , Tecum Italia , Tecum vicit Orbis Christianus . Ego enim ipsas , quæ consecutæ sunt , potentissimi Cæsaris victorias non minùs Tibi , Grimane , tribuo , quàm gloriosissimo illi , Sabaudianæ dicam , an omnium , non modò

modò qui nunc sunt , sed etiam antiquitatis ducum Principi Eugenio ? Ille in campis vicit , Tu in consiliis : Tu voce , ille imperio : Tu lingua , ille manu : Tu Viennæ , ille in Hungaria , Daciaque vicit , sed ille neque in Hungaria , neque in Dacia vicisset , nisi Tu Viennæ victor vincendi in Hungaria ; Daciaque copiam , & materiam illi tribuisses . Ergo Tibi non minùs , quàm præstantissimo illi Legato suo Carolus VI. invictissimus Imperator suos debet postremos , omnium videlicet hætenus præclarissimos triumphos . Tibi Patria non minùs , quàm tot suis strenuissimis Ducibus , & Imperatoribus debet suam incolumitatem , & gloriam . Tibi , tuæque eloquentiæ non minùs , quàm Germanicæ , Venetæque virtuti debet suam Christianus Orbis felicitatem . Quàm bellè nunc caderet Ciceroniana illa Armorum , Togæque concertatio , qua civilem eloquentiam militari virtuti si non præferre , certè equare possemus ! si & pares essent causæ , nefarium scilicet bellum civile , bello triumphi dignissimo : & Tecum Tullius componi posset , vel cum Principe Eugenio L. Antonius . (a) Cincam suum Pyrrhus tantæ prudentiæ in agendo , tantæque vis in dicepdo expertus fuerat , ut plerasque suas victorias illius operæ ascriberet , fassus non semel plures ab illo eloquentia , quàm à se armis subactos esse . Itaque Thessalum illum Oratorem regia voce tam liberaliter ecommendatum gloria suo
D veluti

(a) *Plutarch. in Pyrrho.*

veluti sinu excepit , & pari cum ipso Rege nominis eternitate donavit . Quid Tibi fiat , Venete Orator prestantissime , quem omnium victoriarum , quę per hos tua causa felicissimos annos reportatę sunt , non unius confessione Pyrrhi , sed eorum omnium , quos totidem vel Germanes , vel Venetos Pyrrhos dixerim in totius belli administratione tam egregiē versatos , principium fuisse , ac fontem , equissimum est profiteri ? Cui acceptas referre oportet non illas modò urbes , ac regiones , quę Othomanico iugo subtrahę sunt , neque illas tantum , à quibus inhians tum Scythica rabies aversa est , sed etiam illas , quas contusus , ac fractus ille quondam prædator Orbis non audebit posthac laceßere ? Sed ego maximum hoc , nullaque satis oratione laudandum meritum tuum , Procurator Amplissime , facio quidem plurimi , ut debeo . Illi tamen virtutes tuas , à quibus profectum est , ita præfero , ut Te etiam sine hoc ipso merito , sed cum omnibus tuis virtutibus nihilò suspicerem minùs : contra verò hoc eximio merito insignem , sed aliqua ex plurimis carentem virtutibus tuis Te minorem Petro Grimano judicarem . Merita multa , & ingentia ii quoque quandoque ostentant , qui virtutes habent paucas , & exiles : cum è contra meritorum ingentium , multorumque semper sint saltem capaces , qui virtutibus præditi sunt multis , & magnis . Quis neget alicujus fuisse Catilinę saltem meriti speciem , quam tum prætenderet , cum Consulatum petebat , quo ad patrię internecionem abuteretur ? Cum contra summę virtutis Cato , sed vani semper nominis homo in ea Repub. dictus , posset , si audi-

audiretur, æternam facere suis meritis libertatem Romanam. Laudabilia multa etiam mali faciunt: boni, si locus detur, nonnisi laudabiliter operantur. Tu si Viennæ, Grimane, non eras, aut sapientiam tuam temeritas Othomanica, ut acriter prospiceret, non movebat, id modò singularis meriti non haberes. Ubicumque tamen fueris, aut quidquid Tibi interciderit, pariles tamen fructus gignere potis es, quòd multas, altasque radices jeceris, nempe virtutes. Quilibet Legatus debet sui Principis dotes sin minus omnes, certè quæ sunt illius magis propriæ, ac peculiares, ejusdemque quidam veluti characteres, exprimere, ac præferre. Nihil enim secum ferat illius prudentiæ, cujus futurus est administer? non sensus, cujus est futurus interpres? non eloquentiam, non fortitudinem, non constantiam, nihil denique omnium virtutum, ac veluti lineamentorum illius, cujus futurus est lingua, brachium, pectus, cor, & expressa quædam imago? Quot igitur, & qualibus niteat oportet virtutibus Legatus Venetus, cujus Princeps non is est, qui vel nascatur, vel utcumque eligatur; sed qualem leges, & instituta postulant, qualis, fingentibus, formantibusque sibi civibus, omnium voto concipitur, ut eorum culpa, offensaque sit, si non perfectissimus concipiatur? Adde, quòd Venetus Legatus hujusmodi sui Principis non tam minister est, quàm pars quædam; quò magis perspicuè illum representare teneatur, & quascumque terras adierit, virtutes circumferre omnes non tam Principis, quàm ipsius quodammodo Principatus. Hic autem quàm vellem adhuc esse à principio hujus tam progressæ,

D 2

& for.

& fortasse jam ultra omnes tædii terminos excedentis orationis meæ , neque illud penè absumpsisse temporis , ac spiritus , quo mihi nunc opus esset , ut omnes enarrarem Petri Grimani virtutes inusitatorum meritorum verè fecundas , & Veneto , qualem experti sumus , Legato apprimè dignas ! Quàm multa dicerem de illius eximia sapientia ! siquidem felicissimum ingenium omni literarum genere ab ineunte ætate excolendo tantam rerum Divinarum , humanarumque scientiam assecutus est , dicendi verò , scribendique gravitate , & copia nunquam non exercendo sic adauxit in dies , ut & in Anglia , ubi pro domestica sapientia externa , si non summa , vilescit , ingens , miraque visa sit : & Viennæ Cæsari tanti fuerit , ut in ea difficillima consultatione illius tandem placitis magis , quàm suis rationibus parendum sibi duxerit . Quàm multa dicerem de singulari illius prudentia ! qua primùm ex mira quadam ingenita sibi à natura spiritus alacritate studiis , ac disciplinis educta , deinde peregrinationum observationibus , documentisque veluti quibusdam alimentis nutrita , postremò rerum agendarum experientia , & attenta , quæ illi propria est , obeundi sedulitate corroborata , injunctas sibi à Patria Legationes ita suscepit , ut quidquid ingrueret , jam experto per omnia , quorum alia legerat , alia viderat , alia ipsemet gesserat , nihil trepidandum , nihil festinandum , nihil non incunctanter , laudabiliterque exequendum posset accidere . Quo tamen in loco nequeo me temperare , quò minùs honoris causa memorem Aloysium Marchesinum virum egregium , & inter præclarissimos secundi Ordinis cives facile ex pri-

primis ; in quo ego intimo Grimani à Secretis tum in Anglia , tum in Germania administro assiduo magnum reperio non tam illius naturæ , & virtutis , quàm Grimani prudentiæ simul , & humanitatis argumentum . Nam cum Grimanus sit ex paucissimis non prudentibus tantum , qui aliorum consiliis , monitisve obtemperent , sed prudentissimis , qui cuncta per se cognoscere , & exequi possint (a) : quis satis miretur , vel quanta prudentia simul , & humanitate Grimanus per novem amplius annos Marchesium habuerit , vel quàm prudenti , constantique obsequio Grimano Marchesinus adhæserit , neque Legatus Ministrum neglexerit unquam , tanquam si illius indigus esset , neque Minister à Legato sibi negligi visus fuerit , tanquam si esset illi necessarius ? Quæ deinde dicenda mihi se offerrent de integerrima illius religione , quam etiam primo spectare loco debueram ipsius præpositæ sapientiæ principium , & fontem ! quandoquidem Viennæ , cum alioquin hæc sit etiam natura sideribus , ut parva , & exilia validiorum concursu , præsentiaque obscurentur , inter pientissimos tamen Austriacæ Domus Dei , Divinarumque rerum cultores pietas illius conspicienda fulgebat ; augebatque & ipse venerationem in Superos exemplo venerationis suæ . Quæ mihi non dicenda

mo.

(a) Οὗτος μὲν πανάειρος , ὃς αὐτῷ πάντα νοήσῃ ,
 Φρασάμενος , τὰ κ' ἔπειτα , εἰς τέλος ᾗσιν ἀμείνω .
 Εὐδλὸς δ' αὖ λακύνος , ὃς ἐν εἰπόντι πίθεται .
Hesiod. apud Aristot. Ethic. 1. cap. 4.

modò, sed miranda etiam venirent de rara illius caritate in Patriam! cujus utilitatibus quiete, otio, commodis omnibus, & fortunis, immo & dulci ipsius aspectu diuturniore quodam exilio largè, effusèque donatis, postremò illud ipsum, quod honestis hominibus vita carius est, suam etiam gloriam donavit; cum Viennensis Legationis maxima omnium laude confectè, & perspicuis gratè ipsius Patrie testimoniis, honoribusque summè probatè, detrectandam tum tamen, deprecandamve provinciam diu retinuit, gloriamque jam in securo positam àpertum rursus in discrimen adduxit. Sed hac mea in egritudine, qua mihi neque de his, neque de ceteris Petri Grimani virtutibus loqui vacat, nihil est, quod magis molestè feram, quàm quòd etiam pulcherrimam illius magnificentiam cogar tacitus præterire. Quid enim dicendum, vel non omnino dicendum esset de splendidissimis paratibus illis, & cultibus, quibus videlicet personam, quam gerebat, & Principis vicem tuebatur! Què de ornatibus ædium, què de vehiculorum, equorumque pretiis, de totius supellectilis munditia, & elegantia, de operosiore familiæ cultu, de ludis, & largitionibus, de conviviorum sumptibus, & lautitia nova fortasse, & inaudita possem asferre! Ut splendore, & majestate Principum opes provocaret, & planè regia generositate, ac munificentia eas quoque gentes traheret in admirationem, quæ tantum sua mirari consueverunt. Quancquam convivia non tam conquistis epulis extruere solet, plenoque artis argento, & auro è compluribus abacis adornare, quàm doctarum, animosque pascentium collocutionum suavitate alter Periander condire. Invitatis enim quibusque eruditissi.

ditissimis viris (quæ illius est jucundissima consuetudo) plus Divinarum Scripturarum ex illius mensis, quàm è sacris Exedris, plus Philosophiæ in illius cænaculis, quàm in ullis vel Stoïs, vel Peripatis perstrepat, ipso non auditore tantùm, sed etiam interlocutore, à cuius ore cæteri pendeant. Verùm in omnibus Petri Grimani virtutibus, inque illis præsertim, quæ suavissimos illius mores ad varia etiam diversarum gentium ingenia, & amicitias accommodant, nihil ego laudaverim magis, quàm quòd neque affectatæ sunt, & in speciem ad tempus veluti personæ quædam assumptæ, sed propriæ, & perpetuæ, constantes, & opportunæ; prorsus ut illi ingentæ, & innatæ videantur. Magnanimitas, quæ ita cæteris virtutibus antistat, ut magnanimus Leo cæteris animantibus antecellit, cum grave nescio quid, elatumque spiret, proptereaque plus honorabilis, quàm amabilis videatur, ipsorum solet veneratorum sic lumina, & amores avertere, ut observantiam, reverentiamque conciliare. Hanc animi sui celsitudinem Grimanus oculis, ore, incessu, toto denique prodit corpore, quod natura dignum, ut solet, magna illius mente domicilium metata est; neque tamen apud ullum offendit unquam ex omnibus, quos & hac ipsa, & cæteris virtutibus allicit, & invitat. Pudore, fide incorrupta, nudaque veritate pulcher, & gratiofus; quodque magis mirere, facilis idem, ac severus, urbanus, & serius, gravis, & affabilis, parcus idem, & sumptuosus, in quancumque partem, prout oportuerit, & res, deculque poposcerit, simpliciter tamen, vixque, ut apparet, à se ipso iussus solo naturæ ductu versatur; quasi has virtutes non debeat sibi usu, & exer-

exercitatione quæsitæ , ad easque natus fuerit , non sua industria factus . Quanquam illius natalibus , ac generi aliquid de hac laude tribuendum esse negare vix aulam , qui videam præstantissimos illius Fratres (pace tua , immò maxima , scio , cum voluptate dicam Præstantissime Procur.) Fratres inquam tuos iisdem ornatos virtutibus videam , & nisi quoddam publicæ , quas ipse peregrè tractasti , res Te conjungere cum pluribus populis longèque celebriorem effecere , Tibi omnino similes , ac penè pares . Annon hæc eadem penè omnia repetere deberem , neque alias , nisi tuas ipsas dotes prædicare , si laudandum susciperem majorem natu M. Antonium ; nisi quoddam similes Vobis liberos Domui , Patriæque genitos , mox etiam similes expectatos nepotes illius peculiari merito ascriberem ? Multanè mihi varianda essent , si fieret argumentum orationis Dominicus Urbis amor , & deliciæ Venetæ nobilitatis ? Quid ille , qui diversum secutus est vitæ genus , bellicæ additus arti Georgius , quique nomen suum Turcis non uno experimento fecit tremendum ? Multone minùs militarium virtutum habet , quàm Tu civilium ? Multone minùs sapientiæ , prudentiæque , aut magnificentiæ in classibus , quàm Tu in consiliis exhibuit ? tantæ & ipse caritatis in Patriam , ut illius rationibus hanc ipsam modò possideat Te reducem videndi jucunditatem . Nam Laurentium legationum tuarum comitem assiduam ipse vidisti secundum fuisse à Te omnium , quas simul adiistis , gentium miraculum , scisque non plus exemplorum accepisse à Te , quàm levaminis , ac decoris Tibi attulisse . Quales etiam futuros credimus M. Antonii Filios duo illa crescentia Gentis,

tis, & Patriæ columina Petrum, & Franciscum
 ambos miræ expectationis adolescentes ? nisi quales
 jam esse cæpisse miramur, & quibus unum opte-
 mus, ut quam simillimi fiant nepotes, quos Vobis
 Petrus ex Francisca, nobilissima scilicet, & utroque
 Justiniano, Grimanoque nomine dignissima Coniuge
 procreat, sicut & ipsos Vobis similes fieri gaude-
 mus. Ita est enim profectò, fortes nascuntur ex for-
 tibus, & boni ex bonis, (a) nam cum natura pro-
 viderit, ut in juvencos, & equos procreantium vir-
 tus propagetur : non est dubitandum, quin etiam
 hominum procreationi idem commodi indulserit.
 Tales igitur Vos genuit incomparabilis Parens, in
 quem tota confluerat generositas Atavorum : & ta-
 les præsens ætas, tales etiam posteritas visura est na-
 tos natorum, & nascituros ab illis. (b) Sed cum in-
 sitam vim bona institutio promoveat, rectaque cul-
 tura congenitas animo dotes roboret, atque perficiat :
 ne id quidem desiderandum reliquit sedulus
 Parens, & in liberorum educatione plusquam indu-
 strius; cui etiam propterea non Curii, non Catones
 quærendi fuere, quos ad imitandum proponeret, sed
 satis fuit, ut se in opere inspiciendum, atque obser-
 vandum præberet. Itaque Vos feliciter natos, nec
 minus bene institutos, ab omni vitiorum contagione
 non secus ac seipsum repressos, ac revocatos eò sen-
 sim duxit, ut omnes easdem haberetis virtutes, quia
 E singuli

(a) *Horat. Carm. lib. 4. Od. 4.*

(b.) *Idem ibid.*

singuli suās habetis . Hic Tu porro , Procur. (jam
 non Amplifs. , sed quod laudabilius roor ; Piissime di-
 cam) aures arrigere , aut oculos intendere , siquid ego
 fortè repetere soiam ex tam multis , quæ sæpè non in
 hac Urbe , sed peregre , ubi evagari etiam cariorum
 memoria solet , abs Te audiui de Parente tuo ; cum
 non in secretis cubiculis , intimisque secessibus , sed pa-
 lam in frequentibus , magnificisque principum viro-
 rum , Te ipso , quasi ad hoc unum ornante , atque
 apparante , convivii Patrem laudibus efferebas tuum ,
 merita in Te illius maxima commemorabas , quod
 præsertim parcissimus sibi fuisset semper , ubi verò de
 Patriæ , ac de liberorum honorificentia , & gloria age-
 retur , etiam profusus , Teque illi multò plus , quàm
 Patri debere rara sanè , & prorsus exemplari pietate
 profitebare . Sed modus , qui in dicendo etiam pul-
 chrè , laudabiliterque dicentibus servandus est , ad-
 monet , ut finem dicendi faciam ; cum præsertim de
 lætitia , plausibusque , quibus electio tua ubivis gen-
 tium accepta est , quod mihi extremum proposueram ,
 nihil adhuc , aut nimis pauca , neque suo loco dixerim .
 Verùm quid opus est , quam rem fideles oculi tradide-
 runt sibi , multis immorari verbis , ut eadem etiam
 auribus persuadeatur ? Nam quo die omni Te nomi-
 natione cooptatum cunctis etiam suffragantium votis
 Procuratorem designatum esse innotuit : quibus assen-
 sionibus universi populi honorificentissimo de Te Pa-
 trum iudicio acclamatum est ! Quàm communibus
 omnium Ordinum , quàm certis , & perspicuis , insoli-
 tis tamen , inusitatisque clamoribus , & exultationibus
 toto insequenti triduo declaratum est , quanta singulo-
 rum animos lætitia incessisset ! Ludos etiam addidit Pa-
 ter

ter omnium laudandarum rerum auctor perpetuus ;
 pompa, & magnificentia, ut assolet in publicis rebus,
 non minus, quàm occasio , mirandos , & raros ; in
 quibus tamen, ut ut exquisitæ symphoniz , quando
 per populi vociferationes licebat, aures mulcerent, ut
 ut ardentia de noctu innumera cerea funalia sidera
 provocarent, ut ut omnigenis, quæque nihil appeten-
 dum relinquerent, largitionibus nullus esset modus :
 nihil tamen lætandum erat magis, quàm tuus honor,
 ipsa videlicet causa lætitiæ . Jam verò hoc ipso die,
 quo de illa quasi victoria veluti triumphas, quid est ;
 quod desideretur ad speciem, pompamque iusti trium-
 phi ? ubi ex infinito populo gratulantium globi undæ
 quaque concurrant : ubi ex omnibus, qui ad Tui con-
 spectum properant, nemo est, qui Purpuræ tuæ non
 ore, non gestu, non omnibus gaudii significationibus
 plaudet : ubi institores, atque opifices suas etiam mer-
 ces fecere quasi vocales, gratulantesque Tibi, & omnia
 prospera comprecantes . Patres verò, qui Te mutui
 honoris causa comitantur, quomodo constant sibi !
 Quomodo iudicium de Te olim suum præsentis testa-
 tione lætitiæ comprobant ! Quàm lubentes, & exulta-
 bundi hoc Tibi præstant observantiæ, & amoris offi-
 cium ! Quales incedunt duplici gratulatione contenti ;
 Tibi, quod ita honorificè electus fueris : sibi, quod
 tam iustè elegerint ! Et hæc quidem cives ; quid exte-
 ri, apud quos Tibi nuncius venit electionis tuæ ? Cu-
 jus & ipsi gaudii significationes dedere, ii præsertim ;
 quorum non ita peregrinantur aures, aut hospites to-
 to in Orbe mentes versantur, ut totam Procuratoriæ
 istius dignitatis amplitudinem planè notam non ha-

beant! Non paucos enim ego ipse audivi adeo exigue eruditos , ut vererentur , ne summis ab se cognitis Grimani meritis dignitas par non esset; quorum error mihi causa fuit , ut initio orationis eam cuilibet è summis, quæ ubivis gentium meritis , ac judicio vel datæ sint, vel hodie dentur, saltem æqualem esse pro virili ostenderem . Ceterum qui Venetam majestatem intelligunt , in eaque D. Marci Procuratores primas tenere non nesciunt , hi verò gaudere, lætari, gestire omnes, quod amplissimo honore donatus esses. Hinc omnium ad Te principum nullius non nationis virorum, Legatorum , Ablegatorumque , Nunciorum , Viceque gerentium per complures dies properatio , & concursus; ut Viennæ una in Urbe , sed Romani, quod reliquum est , Imperii capite cunctarum fere gentium gratulationes qua voce , qua scriptis acciperes . Certè Eugenijs, quo amore est in Venetos omnes pro veteri hospitio , in Te verò etiam pro virtutum similitudine , non mediocre gaudium professus est . Certè etiam Cæsar suo se Tibi oraculo aperiens gratum sibi esse declaravit , quod à se probatum Civem etiam à Repub. ita probari videret . Unus vereor , ne non doluerit vehementer Othomanus , si fortè fatalis in se renovati fæderis vel auctorem , vel administrum tanto etiam præmio affectum esse cognoverit . At ne Romæ quidem gratissima potuit esse hæc Dignitas tua , per quam effectum est , ut non sperata modò , sed jam certa tua legatione Civitas ea cupidissima fraudaretur . Cumque Tu illud Religionis , & Sanctitatis Templum jampridem visitatum repetere jam destina-

nasset

nasses , inque illo hoc quoque Tui sacrificium Patriæ , Deoque facere tum etiam cuperes : hæc ipsius Patriæ munificentia gratissima quidem semper, sed tum pietati tuæ visa paulò intempestivior nō mihi fortasse magis displicuit , quàm ipsi Tibi ! Cui quidem jam non humanæ , sed cælesti pietati tuæ quid tandem (quod mihi restare video, Eques, & Procur. Amplifs.) quid inquam augurer tandem, precerque à Superis , quod sit obsequii mei Tibi saltem desiderare ? At ne votis quidem meis ullum video locum relinqui , ubi jam omnia summa concessa esse cognosco meritis tuis. Honorem maximum adeptus es in maxima , florentissimaque Repub. , Tibique Patria carissima . Virtutes omnes , quibus honorem , quem assecutus es , pro dignitate tuearis, habes à pueritia ita consuetas , ut Tibi jam vertent in naturam . Amicos etiam , in quibus magna pars auctoritatis , & felicitatis posita est , plurimos numeras, omnes videlicet Tui similes , viros in Patria, ac tota ferme Europa lectissimos . Nomen tuum à Gadibus usque ad Indos regnat in linguis omnium non modò laudibus , sed etiam gratiarum actionibus celebratum , neque ullis uspiam , nisi forte gloriosis Tibi Turcarum insectationibus execrandum . Quod unum igitur mihi superest , fruire diu tot , ac tantis bonis virtute tua Tibi partis; fruire ista omnium præconio debita Tibi felicitate . Fruire in Patria , quæ in Te tam grata est , quàm Tu pius in illam, fruire diu Parentibus optimis , amantissimis Fratribus , Nepotibus obsequentissimis . Illi contra diutissimè Te florente , qualis nunc es , & supra humanam

nam

nam fortem beato fruuntur . Patria verò Vobis omnibus mutua sic inter Vos , communicataque felicitate beatis tandiu fruatur , quandiu viderit (quando autem non videbit ?) suæ interesse felicitatis .

F I N I S .

